



**I gcás neamhréitigh idir na leaganacha teanga  
éagsula, beidh forlámhas ag an leagan Béarla.**



## **An Clár um Shaoránaigh, Comhionannas, Cearta agus Luachanna (CERV)**

Glaobair thograí

Nascadh Bailte  
(CERV-2024-SAORÁNAIGH-BAILE-TT)

Leagan 2.0



16 Feabhra 2024

<b>STAIR NA nATHRUITHE</b>			
<b>Leagan</b>	<b>Dáta Foilsithe</b>	<b>Athrú</b>	<b>Leathana ch</b>
1.0	12/02/2024	▪ An chéad leagan.	
2.0	16/02/2024	▪ Leagan críochnaitheach	
		▪	
		▪	



## AN GHNÍOMHAIREACTH FEIDHMIÚCHÁIN EORPACH UM OIDEACHAS AGUS CULTÚR (EACEA)

EACEA.B – Cruthaitheacht, Saoránacht, Luachanna AE agus Oibríochtaí Comhpháirteacha  
EACEA.B.3 – Saoránaigh agus Luachanna AE

### GLAO AR THOGRAÍ

#### CLÁR NA nÁBHAR

0. Réamhrá.....	6
1. Cúlra.....	7
2. Cuspóirí — Téamaí agus tosaíochtaí — Gníomhaíochtaí ar féidir iad a mhaoiniú — An tionchar a bhfuiltear ag súil leis.....	8
Cuspóirí.....	8
Téamaí agus tosaíochtaí (raon feidhme) .....	8
Gníomhaíochtaí ar féidir iad a mhaoiniú (raon feidhme).....	9
An tionchar ionchasach.....	10
3. An buiséad atá ar fáil .....	10
4. Tráthchlár agus spriocdhátaí .....	10
5. Inghlacthacht agus doiciméid .....	11
6. Incháilitheacht.....	12
Rannpháirtithe incháilithe (tíortha incháilithe) .....	12
Comhdhéanamh an chuibhreannais.....	14
Gníomhaíochtaí incháilithe .....	14
Suíomh geografach (spriocdhátaí) .....	14
Fad ama.....	14
Buiséad an tionscadail (méid uasta an deontais).....	14
Eitic agus luachanna an Aontais Eorpaigh .....	14
7. Acmhainn airgeadais agus oibríochtúil agus eisiamh.....	15
Acmhainn airgeadais .....	15
Acmhainn oibríochtúil.....	16
Eisiamh .....	17
8. Nós imeachta meastóireachta agus dámhachtana .....	18
9. Critéir dhámhachtana .....	18
10. Leagan amach dlíthiúil agus airgeadais na gComhaontuithe Deontais.....	19
Dáta tosaigh agus fad an tionscadail .....	20
Garspriocanna agus táirgí insoláthartha.....	20
An cineál deontais, an ráta maoinithe agus méid uasta an deontais .....	21
Catagóirí buiséid agus rialacha maidir le hincháilitheacht costas .....	21
Ráthaíochtaí réamh-mhaoinithe.....	21
Deimhnithe .....	22

Córas dliteanais i gcomhair aisghabhálacha.....	22
Forálacha maidir le cur chun feidhme an tionscadail .....	22
Sainiúlachtaí eile .....	22
Neamhchomhlíonadh agus sárú conartha.....	23
11. Conas iarratas a chur isteach.....	23
12. Cabhair.....	24
13. Tábhachtach.....	25

## 0. Réamhrá

Is glao ar thograí é seo ar **dheontais le haghaidh gníomhaíochta** de chuid an Aontais i réimse rannpháirtíocht na Saoránach agus rannpháirtíocht faoin **gClár um Shaoránaigh, Comhionannas, Cearta agus Luachanna (CERV)**. Leagtar amach an creat rialála don Chlár seo um Maoiniú ón Aontas in:

- Rialachán 2018/1046 ([Rialachán Airgeadais an Aontais Eorpaigh](#))
- an bunghníomh (Rialachán CERV [2021/692](#)<sup>1</sup>).

Tá an glao á sheoladh i gcomhréir le Clár Oibre 2023-2024<sup>2</sup> agus is í an **Ghníomhaireacht Feidhmiúcháin Eorpach um Oideachas agus Cultúr (EACEA)** ('an Ghníomhaireacht') a dhéanfaidh é a bhainistiú.

Clúdaítear sa ghlaio **an t-ábhar** seo a leanas:

- **CERV-2024-SAORÁNAIGH-BAILE-TT – Nascadh Bailte**

Iarraimid ort **doiciméid an ghlaio** a léamh go cruinn, agus go háirithe Doiciméad an Ghlaio seo, an tSamhail-Chomhaontú Deontais, [Lámhleabhar Ar Líne Thairseach Maoinithe & Tairiscintí AE](#) agus [AGA Deontas AE – Comhaontú Deontais Anótáilte](#).

Tá soiléiriú agus freagraí le fáil sna doiciméid seo ar cheisteanna a d'fhéadfadh a bheith agat le linn duit d'iaratas a ullmhú:

- leagtar amach i nDoiciméad an Ghlaio:
  - cúlra, cuspóirí, raon feidhme, gníomhaíochtaí ar féidir iad a mhaoiniú agus na torthaí ionchais (codanna 1 agus 2)
  - an tráthchlár agus an buiséad atá ar fáil (codanna 3 agus 4)
  - inghlacthacht agus coinníollacha incháilitheachta (lena n-áirítear doiciméid éigeantacha; codanna 5 agus 6)
  - critéir maidir le hacmhainn airgeadais agus oibríochtúil agus eisiámh (cuid 7)
  - an nós imeachta meastóireachta agus dámhachtana (cuid 8)
  - critéir dhámhachtana (cuid 9)
  - leagan amach dlíthiúil agus airgeadais na gComhaontuithe Deontais (cuid 10)
  - conas iaratas a chur isteach (cuid 11)
- déantar cur síos sa [Lámhleabhar Ar Líne](#) ar:
  - nósanna imeachta chun tograí a chlárú agus a chur isteach ar líne trí Thairseach Maoinithe & Tairiscintí AE ('an Tairseach')
  - moltaí maidir leis an iaratas a ullmhú

<sup>1</sup> Rialachán (AE) 2021/692 ó Pharlaimint na hEorpa agus ón gComhairle an 28 Aibreán 2021 lena mbunaítear an Clár um Shaoránaigh, Comhionannas, Cearta agus Luachanna (IO L 156, 5.5.2021, lch. 1).

<sup>2</sup> Cinneadh Cur Chun Feidhme C/2022/8588 ón gCoimisiún an 1 Nollaig 2022 maidir le glacadh an chláir oibre i gcomhair 2023-2024 agus an cinneadh maoiniúcháin maidir le cur chun feidhme an Chláir um Shaoránaigh, Comhionannas, Cearta agus Luachanna.

- cuimsítear in AGA – An Comhaontú Deontais Anótáilte:
  - nótaí mínithe mionsonraithe maidir leis na forálacha ar fad sa Chomhaontú Deontais a bheidh le síniú agat chun an deontas a fháil (*lena n-áirítear incháilitheacht costais, sceideal íocaíochta, oibleagáidí tánaisteacha, etc.*).

Moltar duit freisin féachaint ar [shuíomh gréasáin Thorthaí Thionscadal an Chláir um an Eoraip do Shaoránaigh](#), [leathanach gréasáin thorthaí an Chláir REC](#) agus [Foireann Uirlisí Daphne](#) chun féachaint ar liosta na dtionscadal a fuair maoiniú roimhe seo.

## 1. Cúlra

Soláthraítear leis an gClár um Shaoránaigh, Comhionannas, Cearta agus Luachanna maoiniú le haghaidh rannpháirtíocht saoránach, comhionannas do chách agus cur chun feidhme ceart agus luachanna an Aontais. Tugtar le chéile sa Clár um Shaoránaigh, Comhionannas, Cearta agus Luachanna (dá ngairtear ‘an clár’ anseo feasta) an clár um Chearta, Comhionannas agus Saoránacht a bhí i bhfeidhm roimhe seo agus an clár um Eoraip do Shaoránaigh a bhí i bhfeidhm roimhe seo<sup>3</sup>.

Faoin gclár sin, tacaítear le malartuithe idir daoine ó thíortha éagsúla, ó chultúir éagsúla, ó chúlraí inscne agus ó chúlraí socheacnamaíochta éagsúla, treisítear an chomhthuiscint agus an chaoinfhuilíngt agus tugtar an deis do dhaoine a meon a leathnú agus muintearas agus féiniúlacht Eorpach a fhorbairt trí nascadh bailte agus trí líonraí bailte.

Go háirithe, tá sé ina aidhm leis an tionscadal um Nascadh Bailte malartuithe idir daoine ó thíortha éagsúla a chur chun cinn chun comhthuiscint agus caoinfhuilíngt a threisiú agus an deis a thabhairt dóibh a meon a leathnú agus braistint mhuintearais agus féiniúlachta a fhorbairt i leith na hEorpa. Cé gur cur chuige ón mbun aníos atá i gceist sa chlár, soláthraítear leis freisin an deis, go háirithe i ndáil le nascadh bailte, chun díriú ar thosaíochtaí de chuid an Aontais. Is éard is brí leis sin ná feabhas a chur ar eolas áitiúil ar na cearta a eascraíonn as saoránacht an Aontais, mar shampla, nó eolas a chothú agus dea-chleachtais a roinnt ar na buntáistí a bhaineann le héagsúlacht agus le comhionannas inscne. Ar deireadh, le [gradam Phríomhchathracha Cuimsithe agus Éagsúlachta na hEorpa](#)<sup>4</sup>, tabharfar aitheantas don ról atá ag cathracha agus ag údaráis áitiúla maidir le héagsúlacht agus cuimsiú a chothú.

Tá sé ina aidhm leis an nGlaó seo ar Thograí tacú leis na tionscnaimh bheartais seo a leanas: an Plean Gníomhaíochta um an Daonlathas Eorpach<sup>5</sup>, creat straitéiseach an Aontais maidir leis na Romaigh i ndáil le comhionannas, cuimsiú agus rannpháirtíocht<sup>6</sup>, straitéis chun cur i bhfeidhm na Cairte um Chearta Bunúsacha san Aontas Eorpach a neartú<sup>7</sup>, an Straitéis um Chomhionannas Inscne 2020-2025<sup>8</sup>, Tuarascáil ar Shaoránacht AE 2020<sup>9</sup>.

<sup>3</sup> Rialachán (AE) Uimh. 1381/2013 ó Pharlaimint na hEorpa agus ón gComhairle an 17 Nollaig 2013 lena mbunaítear lena mbunaítear Clár um Chearta, um Chomhionannas agus um Shaoránacht don tréimhse 2014-2020 (IO L 354, 28.12.2013, Ich. 62). Rialachán (AE) Uimh. 390/2014 ón gComhairle an 14 Aibreán 2014 lena mbunaítear an clár ‘Eoraip do Shaoránaigh’ don tréimhse 2014-2020 (IO L 115, 17.4.2014, Ich. 3)

<sup>4</sup> [Gradam Phríomhchathracha Cuimsithe agus Éagsúlachta na hEorpa \(europa.eu\)](#)

<sup>5</sup> [An Plean um an Daonlathas Eorpach \(europa.eu\)](#)

<sup>6</sup> [Straitéis nua an Aontais Eorpaigh i leith na Romach \(europa.eu\)](#)

<sup>7</sup> [Straitéis an Aontais chun cur i bhfeidhm na Cairte a neartú \(europa.eu\)](#)

<sup>8</sup> [Straitéis um Chomhionannas Inscne 2020-2025](#)

<sup>9</sup> [Tuarascáil 2020 ar Shaoránacht AE](#)

## **2. Cuspóirí — Téamaí agus tosaíochtaí — Gníomhaíochtaí ar féidir iad a mhaoiniú — An tionchar a bhfuiltear ag súil leis**

### Cuspóirí

Is é is cuspóir don ghla seo ar thograí malartuithe idir saoránaigh ó thíortha éagsúla a chur chun cinn, go háirithe trí bhailte a nascadh, ionas go mbeidh taithí phraiticiúil acu ar shaibhreas agus ar éagsúlacht chomhoidhreacht an Aontais agus chun iad a chur ar an eolas gur bunchloch iad sin le haghaidh todhchaí chomhchoiteann.

Tá sé ina aidhm leis an nglao seo tacú le tionscadail faoina dtugtar réimse leathan daoine le chéile ó bhailte nasctha, ó chúlra socheacnamaíoch éagsúla, inscne agus tíortha. Trí dhaoine den phobal a shlógadh ar leibhéil áitiúla agus ar leibhéal an Aontais chun saincheisteanna sonracha a phlé maidir le clár oibre polaitiúil na hEorpa, féachann an glao seo le comhthuiscint, cuimsiú agus éagsúlacht chultúrtha a chur chun cinn agus deiseanna a fhorbairt le haghaidh rannpháirtíocht chathartha ar leibhéal an Aontais.

Go sonrach:

- malairtí idir saoránaigh tíortha éagsúla a chur chun cinn;
- taithí phraiticiúil a thabhairt do na saoránaigh ar shaibhreas agus ar éagsúlacht chomhoidhreacht an Aontais agus iad a chur ar an eolas gur bunchloch iad sin le haghaidh todhchaí chomhchoiteann;
- caidreamh síochánta idir saoránaigh na hEorpa a ráthú agus a rannpháirtíocht ghníomhach ar an leibhéal áitiúil a áirithiú;
- comhthuiscint agus cairdeas idir saoránaigh na hEorpa a threisiú;
- comhoibriú idir bardais agus malartú dea-chleachtais a spreagadh;
- tacú le dea-rialachas áitiúil agus
- daingniú a dhéanamh ar ról na n-údarás áitiúil agus réigiúnach i bpróiseas lánpháirtíochta na hEorpa.

Táthar ag súil, faoi thionscadail um Nascadh Bailte, go ndéanfar machnamh ar insint nua ar an Eoraip, tionscadail a bheidh dírithe ar shaoránaigh, a bheidh ag cur comhionannais chun cinn, a bheidh réambhbreathnaitheach agus cuiditheach, agus a bheadh níos rannpháirtí don ghlúin óg go háirithe. D'fhéadfaí tionscadail a bhunú ar thoradh comhairliúchán le saoránaigh agus d'fhéadfaidís a bheith mar bhonn le díospóireachtaí faoi bhealaí praiticiúla chun Aontas níos daonlathaí a chruthú, chun a chur ar a gcumas do shaoránaigh nasc a bhunú leis an Aontas agus cur lena meon úinéireachta i leith an tionscadail Eorpaigh.

### Téamaí agus tosaíochtaí (raon feidhme)

Cabhraíonn an clár CERV le hidirphlé idirchultúrtha a chur chun cinn trí dhaoine a bhfuil náisiúntachtaí difriúla agus teangacha difriúla acu a thabhairt le chéile agus deis a thabhairt dóibh páirt a ghlacadh i ngníomhaíochtaí coiteanna. Sa chomhthéacs sin, ardóidh tionscadail um Nascadh Bailte feacht ar shaibhreas thimpeallacht chultúrtha agus theangeolaíoch na hEorpa agus cuirfidh siad comhthuiscint agus meas chun cinn, rud a chuirfidh le forbairt féiniúlachta Eorpacha atá measúil, dinimiciúil agus ilghnéitheach agus leis an meas ar chomhluachanna, daonlathas agus cearta bunúsacha.

I bhfianaise an chuspóra fhoriomláin sin, féadfar aghaidh a thabhairt sna tionscadail ar na hábhair seo a leanas (níl an liosta uileghabhálach):

- Tá an tAontas Eorpach bunaithe ar dhlúthpháirtíocht: dlúthpháirtíocht idir saoránaigh, dlúthpháirtíocht idir na Ballstáit, agus dlúthpháirtíocht trí ghníomhaíochtaí tacaíochta laistigh agus lasmuigh den Aontas. Is luach comhpháirteach í an dlúthpháirtíocht lena gcothaítear comhtháthú agus lena dtugtar aghaidh ar dhúshláin shochoaíocha. Ba cheart go gcuideodh tionscadail um



Nascadh Bailte leis an gceann is fearr a fháil ar chlaonadh sna tuiscintí ar thíortha éagsúla trí chomhthuiscint a chothú agus trí fhóiríam a bhunú inar féidir réitigh chomhchoiteanna a phlé ar bhealach cuiditheach. Ba cheart gurb é an aidhm a bheadh acu feasacht a mhúscailt maidir leis an tábhacht a bhaineann le próiseas lánpháirtíochta na hEorpa a threisiú, próiseas atá bunaithe ar dhlúthpháirtíocht agus ar luachanna an Aontais;

- Ba cheart go dtabharfadh tionscadail um Nascadh Bailte an deis do shaoránaigh an cineál Eoraip atá uathu a chur in iúl. Ba cheart díospóireachtaí a fhaigheann tacaíocht faoin nglao ar Nascadh Bailte a bheith bunaithe ar éachtaí sonracha an Aontais agus ar na ceachtanna a foghlaimíodh ón stair agus ó lánpháirtíú na hEorpa. Ina theannta sin, ba cheart machnamh a bheith iontu ar threochtaí reatha agus ba cheart a chur ar a gcumas do rannpháirtithe dúshlán an Eoraisceipteachas a thabhairt agus gníomhartha féideartha a mholadh a d'fhéadfadh an tAontas a dhéanamh chun meon an mhuintearais a chothú san Eoraip, chun an tuiscint ar bhuntáistí an Aontais a mhéadú agus chun comhtháthú sóisialta agus polaitiúil an Aontais a threisiú.

Moltar go háirithe tionscadail atá dírithe ar dhul chun tairbhe na rannpháirtithe díreacha agus, anuas air sin, chun tairbhe shaoránaigh na mbailte rannpháirteacha, ós rud é gur féidir leo sin cabhrú le cur leis an taithí phraiticiúil ar an saibhreas agus an éagsúlacht a bhaineann le hoidhreacht choiteann an Aontais. Chomh maith leis sin, d'fhéadfaí machnamh ginearálta, ach gan é a bheith eisiach, a dhéanamh ar aon tionchar a d'fhéadfadh sé a bhí ag paindéim COVID-19 ar an saol i bpobail áitiúla na n-iarratasóirí, ar an mbealach a bhfeidhmíonn a bpobail agus ar mar a léiríodh rannpháirtíocht na saoránach agus an dlúthpháirtíocht i mbailte na n-iarratasóirí le linn ghéarchéim COVID-19 agus ar conas a d'fhéadfadh an léiriú sin a bheith inbhuanaithe amach anseo. D'fhéadfadh tionscadail spreagadh a fháil ón [tionscnamh 'Bauhaus Eorpach Nua'](#) nó a bheith bainteach leis.

Ba cheart do thionscadail gníomhaíochtaí agus cineálacha cur chuige nuálacha a mholadh, agus díriú ar bhealach atá íogair ó thaobh inscne de ar na riachtanais agus ar na dúshláin atá os comhair grúpaí spriocdhírithé i mbardais nasctha.

### *Gníomhaíochtaí ar féidir iad a mhaoiniú (raon feidhme)*

Féadfar na nithe seo a leanas, i measc nithe eile, a áireamh ar na gníomhaíochtaí a bhaineann le Nascadh Bailte:

- ceardlanna,
- seimineáir,
- comhdhálacha,
- gníomhaíochtaí oiliúna,
- cruinnithe saineolaithe,
- seimineáir ghréasáin,
- gníomhaíochtaí múscailte feasachta,
- imeachtaí cultúrtha, féilte, taispeántais,
- sonraí (atá neamh-imdhealaithe ó thaobh inscne de) a bhailiú agus a cheadú,
- dea-chleachtais a fhorbairt, a mhalartú agus a scaipeadh i measc údaráis phoiblí agus eagraíochtaí na sochaí sibhialta,
- uirlisí cumarsáide a fhorbairt agus úsáid na meán sóisialta.

Ba cheart dearcadh an chomhionannais inscne a chur san áireamh agus gníomhaíochtaí na dtionscadal á ndearadh, lena chinntiú go mbeidh siad inrochtana do mhná agus d'fhir ar théarmaí comhionanna, agus go mbeidh mná agus fir araon ábalta páirt a ghlacadh iontu.

Táthar ag súil go gcuirfidh dearadh agus feidhmiú na dtionscadal comhionannas inscne agus príomhshruthú an neamh-idirdhealaithe chun cinn laistigh de raon feidhme na

ngníomhaíochtaí. Mar shampla, ba cheart d'iarratasóirí [anailís inscne](#) a dhéanamh ar thopaicí a dtugtar aghaidh orthu i ngníomhaíochtaí tionscadail agus ba cheart dóibh an anailís sin a chur san áireamh ina dtogra. Is féidir leis sin cabhrú le taithí agus riachtanais mhuintir na hEorpa a bhfuil inscne éagsúil acu a chur i gcomhthéacs. Is féidir leis freisin mapáil a dhéanamh ar an tionchar éagsúil a d'fhéadfadh a bheith ag an tionscadal agus ag a ghníomhaíochtaí ar mhná agus ar fhir agus ar chailíní agus ar bhuaicillí, ina n-éagsúlacht ar fad. Chuige sin, moltar d'iarratasóirí féachaint ar na príomhcheisteanna atá liostaithe ar [shuíomh gréasáin EIGE](#) agus a n-anailís inscne á déanamh acu. D'fhéadfadh an anailís sin cabhrú le seachaint aon éifeachtaí diúltacha neamhbheartaithe a bhaineann leis an idirghabháil ar cheachtar inscne (cur chuige 'gan dochar a dhéanamh')<sup>11</sup>.

Táthar ag súil go ndéanfaidh iarratasóirí a ngníomhaíochtaí cumarsáide agus scaipthe a cheapadh agus a chur chun feidhme ar bhealach atá íogair ó thaobh inscne de. Áirítear leis sin, go háirithe, úsáid teanga atá íogair ó thaobh inscne de. Is amhlaidh an cás maidir le gníomhaíochtaí faireacháin agus meastóireachta a cheapadh agus a chur chun feidhme. Breithneofar go mbaineann cáilíocht níos airde le tograí ina gcomhtháthaítear gné na hinscne ar fud a ngníomhaíochtaí go léir.

Má tá an tionscadal ar scála an-bheag agus é teoranta do chineál amháin gníomhaíochta, mar shampla imeachtaí cultúrtha, d'fhéadfaí an machnamh ar ghné na hinscne a choigeartú de réir raon feidhme do thionscadail.

#### An tionchar ionchasach

- Comhthuiscint agus cairdeas a mhéadú agus a spreagadh idir saoránaigh ar an leibhéal áitiúil.
- Tacú le saoránaigh ó phobail áitiúla blaiseadh den bhreisluach a chuireann an tAontas ar fáil trí chur chuige atá bunaithe ar an bpobal, agus an breisluach sin a aithint.
- Cur leis an muintearas a bhraitear san Aontas.
- Nasc buan a spreagadh idir bardais agus idir saoránaigh.

### **3. An buiséad atá ar fáil**

Is é **EUR 4 000 000** an buiséad measta atá ar fáil don ghla.

Forchoimeádaimid an ceart gan an maoiniú go léir atá ar fáil a dhámhachtain nó é a athdháileadh idir tosaíochtaí an ghla, ag brath ar na tograí a gheofar agus ar thorthaí na meastóireachta.

### **4. Tráthchlár agus spriocdhátaí**

<b>Tráthchlár agus spriocdhátaí (táscach)</b>	
Oscailt an ghla:	an 9 Aibreán 2024
<u>Spriocdháta don iarratas:</u>	<b><u>19 Meán Fómhair 2024 – 17:00:00 Am</u></b> <b><u>Lár na hEorpa (An Bhruiséil)</u></b>
Measúnú:	Meán Fómhair 2024/Feabhra 2025
Faisnéis faoi thorthaí meastóireachta:	Márta 2025
Síniú GA:	Meitheamh 2025

## 5. Inghlacthacht agus doiciméid

Ní mór tograí a chur isteach roimh **spriocdháta an ghla** (*féach an tráthchlár i gcuid 4*).

Ní mór tograí a chur isteach go **leictreonach** trí Chóras Leictreonach um Chur Isteach na Tairisí Maoinithe & Tairiscintí (ar fáil ar an leathanach Topaice sa rannóg [Cuardaigh Maoiniú & Tairiscintí](#)). NÍ FÉIDIR iarratas ar pháipéar a chur isteach.

Ní mór tograí (lena n-áirítear iarscríbhinní agus doiciméid tacaíochta) a chur isteach trí úsáid a bhaint as na foirmeacha a sholáthraítear *laistigh* den Chóras Aighneachta (⚠️ NÍ na doiciméid atá ar fáil ar an leathanach Topaice — is le haghaidh faisnéise amháin iad sin).

Ní mór go mbeadh tograí **iomlán** agus go mbeadh an fhaisnéis go léir a iarradh iontu mar aon leis an hiarscríbhinní agus na doiciméid tacaíochta riachtanacha ar fad:

- Foirm Iarratais Cuid A — faisnéis riaracháin faoi na rannpháirtithe (an comhordaitheoir, na tairbhíthe agus na heintitis chleamhnaithe a bheartaítear) agus buiséad achoimrithe an tionscadail (*le líonadh isteach go díreach ar líne*)
- Foirm Iarratais Cuid B — cur síos teicniúil ar an tionscadal (*ní mór í a íoslódáil ón gCóras Tairisí um Chur Isteach, í a chomhlánú agus a chur le chéile agus a ath-uaslódáil*)
- I gCuid C tá sonraí breise faoin tionscadal agus faoi mar a rannchuidíonn an tionscadal le príomhtháscarí feidhmíochta chlár an Aontais (*le líonadh isteach go díreach ar líne*)

### iarscríbhinní éigeantacha

- áireamhán cnapshuime (ní mór an teimpléad a íoslódáil ón gCóras Tairisí um Chur Isteach, é a chomhlánú agus a chur le chéile agus a ath-uaslódáil)

**doiciméid tacaíochta** (*ní mór na teimpléid a íoslódáil ón gCóras Tairisí um Chur Isteach, iad a chomhlánú agus a chur le chéile agus a ath-uaslódáil*):

- liosta na dtionscadal a bhí ann roimhe seo (príomhthionscadail le 4 bliana anuas) (*tá teimpléad ar fáil i gCuid B*). Neamhbhainteach maidir le heagraíochtaí nuabhunaithe.
- litir thacaíochta arna síniú ag an mBardas (infheidhme maidir le hiarratasóirí agus le comhpháirtithe faoin gcatagóir 'Eagraíocht neamhbhrabúis a dhéanann ionadaíocht d'údarás áitiúil'). Ní mór an doiciméad a chur ar fáil le linn chéim GAP ar a dhéanaí.
- maidir le rannpháirtithe a chuireann gníomhaíochtaí i gcrích ina bhfuil leanaí páirteach (leanaí faoi 18 mbliana d'aois): ní mór d'eintitis phoiblí dearbhú ar onóir a shíniú agus a chur i gceangal ag an gcéim ag a bhfuil an deontas á ullmhú, má roghnaítear an t-iarratas; ní mór d'eintitis neamhbhrabúis phríobháideacha a mbeartas um chosaint leanaí a chur isteach, ina gcumhdaítear na ceithre réimse a ndéantar cur síos orthu sna [Caighdeáin um Chosaint Leanaí maidir le Leanaí a Choinneáil Sábháilte](#)


Nuair a chuirfean an togra isteach, beidh ort a dheimhniú go bhfuil an **sainordú agat gníomhú** thar ceann gach iarratasóra. Ina theannta sin, beidh ort a dheimhniú go bhfuil an fhaisnéis san fhoirm iarratais ceart agus iomlán agus go gcomhlíonann na rannpháirtithe na coinníollacha chun maoiniú a fháil ón Aontas (go háirithe incháilitheacht, acmhainn airgeadais agus oibríochtúil, eisiamh, etc.). Sula síneofar an deontas, beidh ar gach tairbhí agus eintiteas cleamhnaithe é sin a dheimhniú arís trí

dhearbhú onóra (DoH) a shíniú. Diúltófar do thograí nach bhfuil doiciméid thacaíocht iomlána ag gabháil leo.

Ní mór go mbeadh d'íarratas **inléite, inrochtana agus inphriontáilte**.

Tá na tograí teoranta do **40 leathanach** ar a mhéad (Cuid B). Ní bhreithneoidh meastóirí aon leathanaigh bhreise.

B'fhéidir go n-iarrfar ort ag céim níos déanaí tuilleadh doiciméad a chur ar fáil (*maidir le bailíochtú eintitis dhlítheanaigh, seiceáil acmhainne airgeadais, bailíochtú cuntais bainc, etc.*).

 Tá tuilleadh faisnéise faoin bpróiseas um chur isteach (lena n-áirítear gnéithe TF), le fáil sa [Lámhleabhar ar Líne](#).

## 6. Incháilitheacht

Ní mheasfar iarratais a bheith incháilithe ach amháin má tá a n-inneachar ag teacht go hiomlán (nó go páirteach ar a laghad) leis an gcur síos ar an topaic ar cuireadh isteach iad ina leith.

### *Rannpháirtithe incháilithe (tíortha incháilithe)*

Chun bheith incháilithe, ní mór do na hiarratasóirí (na tairbhíthe):

- a bheith ina n-eintitis dhlítheanacha (comhlachtaí poiblí nó príobháideacha)
- a bheith bunaithe i gceann de na tíortha incháilithe, i.e.:
  - Ballstáit an Aontais Eorpaigh (tíortha agus críocha thar lear san áireamh)
  - tíortha nach tíortha den Aontas Eorpach iad:
    - tíortha atá comhlachaithe le Clár CERV ([liosta na dtíortha rannpháirteacha](#))

coinníollacha incháilitheachta eile:

- Ní mór gur comhlacht poiblí nó eagraíocht neamhbhrabúis le pearsantacht dhlítheanach, atá bunaithe go foirmiúil i gceann de na tíortha incháilithe, é an príomhiarratasóir agus a chomhpháirtí nó a chomhpháirtithe comhlachaithe. Ní mór gur bailte/bardais iad agus/nó leibhéil eile údarás áitiúil nó a gcoistí um nascadh, nó eagraíochtaí neamhbhrabúis eile a dhéanann ionadaíocht d'údarás áitiúla.
- Ní mór gur tionscadal trasnáisiúnta atá i gceist agus ní mór bardais ó dhá thír incháilithe, ar a laghad, a bheith páirteach ann, ar Ballstát den Aontas Eorpach í tír amháin acu ar a laghad.
- Ní mór na gníomhaíochtaí a dhéanamh i gceann ar bith de na tíortha incháilithe atá rannpháirteach sa tionscadal.
- Ní mór 50 rannpháirtí díreach ar a laghad a bheith páirteach sna himeachtaí, agus gur 'rannpháirtithe idirnáisiúnta ar tugadh cuireadh dóibh' iad 25 rannpháirtí ar a laghad<sup>10</sup>

Ní mór do thairbhíthe agus d'eintitis chleamhnaithe clárú sa [Chlár Rannpháirtithe](#) — sula gcuirtear an togra isteach — agus caithfidh an tSeirbhís Lárnach Bailíochta

<sup>10</sup> Is ionann 'rannpháirtithe idirnáisiúnta ar tugadh cuireadh dóibh' agus rannpháirtithe ó chomhpháirtithe comhlachaithe atá ag taisteal ó thír chuig tír eile atá ag óstáil imeacht um Nascadh Bailte.

(Bailíochtú REA) iad a bhailíochtú. Maidir leis an mbailíochtú, iarrfar orthu doiciméid ina léirítear a stádas agus tionscnamh dlíthiúil a uaslódáil.

Féadfaidh eintitis eile a bheith rannpháirteach i róil chuibhreannais eile, amhail comhpháirtithe comhlachaithe, fochonraitheoirí, tríú páirtithe a thugann ranníocaíochtaí comhchineáil, etc. (*féach cuid 13*).

### *Cásanna sonracha*

Daoine nádúrtha — NÍL daoine nádúrtha incháilithe (seachas daoine féinfhostaithe, i.e. trádálaithe aonair, sa chás nach bhfuil pearsantacht dhlítheanach ag an gcuideachta ar leithligh ó phearsantacht dhlítheanach an duine nádúrtha).

Eagraíochtaí idirnáisiúnta — Tá eagraíochtaí idirnáisiúnta incháilithe. Níl feidhm ag rialacha maidir le tíortha incháilithe i ndáil leo.


Eintitis gan phearsantacht dhlítheanach — Eintitis nach bhfuil pearsantacht dhlítheanach acu faoina ndlí náisiúnta, féadfaidh siad páirt a ghlacadh ar bhonn eisceachtúil, ar choinníoll go mbeidh an acmhainn ag a n-ionadaithe oibleagáidí dlíthiúla a chomhlíonadh ar a son, agus go dtabharfaidh siad ráthaíochtaí go ndéanfar leasanna airgeadais an Aontais a chosaint, ar ráthaíochtaí iad atá coibhéiseach leo siúd arna dtabhairt ag daoine dlítheanacha<sup>11</sup>.

Comhlachtaí an Aontais Eorpaigh — NÍ féidir le comhlachtaí an Aontais Eorpaigh (seachas Airmheán Comhpháirteach Taighde an Choimisiúin Eorpaigh) a bheith páirteach sa chuibhreannas.

Comhlachais agus grúpálacha sainleasa — Féadfaidh eintitis atá comhdhéanta de chomhaltaí a bheith rannpháirteach mar 'thairbhíthe aonair' nó 'tairbhíthe gan pearsantacht dhlítheanach'<sup>12</sup>. ⚠️ Más iad na comhaltaí a chuirfidh chun feidhme an ghníomhaíocht, ba cheart dóibh páirt a ghlacadh inti freisin (mar thairbhíthe nó mar eintitis chleamhnaithe, nó NÍ bheidh a gcostais incháilithe).

Tíortha atá i mbun caibidlíochta faoi láthair maidir le comhaontuithe comhlachais — Féadfaidh tairbhíthe ó thíortha a bhfuil caibidlíocht ar bun acu maidir le rannpháirtíocht sa chlár (*féach liosta na dtíortha rannpháirteacha thuas*) páirt a ghlacadh sa ghlaio agus is féidir leo deontais a shíniú má thugtar an chaibidlíocht chun críche sula síneofar an deontas agus má chlúdaíonn an comhlachas an ghlaio (i.e. tá sé aisghníomhach agus clúdaítear leis an chuid den chlár agus an bhliain inar seoladh an ghlaio).

Bearta sriantacha AE — Tá feidhm ag rialacha speisialta maidir le heintitis áirithe (e.g. eintitis atá faoi réir [bhearta sriantacha de chuid an Aontais](#) faoi Airteagal 29 den Chonradh ar an Aontas Eorpach (CAE) agus faoi Airteagal 215 den Chonradh ar Fheidhmiú an Aontais Eorpaigh (CFAE)<sup>13</sup>). Níl eintitis den sórt sin incháilithe chun bheith rannpháirteach in aon cháil, lena n-áirítear mar thairbhíthe, eintitis chleamhnaithe, comhpháirtithe comhlachaithe, fochonraitheoirí nó faighteoirí tacaíochta airgeadais do thríú páirtithe (más ann dóibh).

 Má theastaíonn tuilleadh faisnéise uait, *féach na [Rialacha maidir le Bailíochtú Eintiteas Dlítheanach, Ceapachán LEAR agus Measúnú ar Acmhainn Airgeadais](#)*.

<sup>11</sup> Féach Airteagal 197(2)(c) de Rialachán Airgeadais [2018/1046](#) an Aontais Eorpaigh.

<sup>12</sup> Le haghaidh na sainmhíne, féach Airteagal 187(2) agus Airteagal 197(2)(c) de Rialachán Airgeadais [2018/1046](#) an Aontais Eorpaigh.

<sup>13</sup> Tabhair do d'aire, le do thoil, go bhfuil an liosta oifigiúil le fáil in Iris Oifigiúil an Aontais Eorpaigh agus, i gcás díospóide, go bhfuil forlámhas ag an ábhar atá ann ar [Léarscáil Smachtbhannaí an Aontais Eorpaigh](#).

### Comhdhéanamh an chuibhreannais

Ní cheadaítear ach iarratais ó iarratasóirí aonair (tairbhíthe aonair).

Ní mór bardais ó 2 thír incháilithe, ar a laghad, ar Ballstát den Aontas Eorpach ceann amháin acu ar a laghad, a bheith páirteach i dtograí.

### Gníomhaíochtaí incháilithe

Is iad na gníomhaíochtaí incháilithe na gníomhaíochtaí a leagtar amach i gcuid 2 thuas.

Ní mór go mbeadh ar a laghad 50 rannpháirtí díreach páirteach in imeachtaí um Nascadh Bailte, agus gur `rannpháirtithe ar tugadh cuireadh dóibh' iad 25 rannpháirtí ar a laghad. Is ionann `rannpháirtithe idirnáisiúnta ar tugadh cuireadh dóibh' agus toscaireachtaí ó chomhpháirtithe comhlachaithe atá ag taisteal ó thír chuig tír eile atá ag óstáil imeacht um Nascadh Bailte.

Níl imeachtaí ar líne incháilithe.

Beidh ar thionscadail breisluach ar leith a léiriú sa tuairisc ar na gníomhaíochtaí (e.g. nuálaíocht, dea-chleachtais).

Maidir le hiarratais a dhéantar arís ó bhliain amháin go bliain eile arna gcur isteach ag an iarratasóir céanna, ba cheart breisluach na gníomhaíochta nua/leanúnachas na gníomhaíochta a léiriú san iarratas.

Ba cheart a chur san áireamh sna tionscadail torthaí na dtionscadal a fuair tacaíocht faoi chlár mhaoinithe eile de chuid an Aontais. Ní mór cur síos a dhéanamh ar na gnéithe comhlántacha sna tograí tionscadail (Cuid B den Fhoirm Iarratais).

Ní mór do thionscadail cloí le leasanna agus tosaíochtaí beartais an Aontais (*amhail beartas comhshaoil, sóisialta, slándála, tionsclaíoch agus trádála, etc.*).

Ní cheadaítear tacaíocht airgeadais a thabhairt do thríú páirtithe.

### Suíomh geografach (spriochíortha)

Ní mór do thograí baint a bheith acu le gníomhaíochtaí atá ar siúl sna tíortha incháilithe (*féach thuas*).

### Fad ama

Ba cheart gur idir 6 mhí agus 12 mhí a mhairfidh na tionscadail de ghnáth.

Is féidir síneadh ama a chur leo ar bhonn leasú, ach údar cuí a thabhairt.

### Buiséad an tionscadail (méid uasta an deontais)

Meastar go mbeidh buiséad idir EUR 8 455 agus EUR 50 745 in aghaidh an tionscadail ann.

### Eitic agus luachanna an Aontais Eorpaigh

Ní mór do thionscadail cloí leis na nithe seo a leanas:

- na caighdeáin eiticíúla is airde
- luachanna an Aontais bunaithe ar Airteagal 2 den Chonradh ar an Aontas Eorpach agus ar Airteagal 21 de Chairt um Chearta Bunúsacha an Aontais Eorpaigh agus

- dlí an Aontais, dlí idirnáisiúnta agus dlí náisiúnta eile is infheidhme (lena n-áirítear an Rialachán Ginearálta maidir le Cosaint Sonraí [2016/679](#)).

Ní mór do thionscadail iarracht a dhéanamh comhionannas inscne agus príomhshruthú an neamh-idirdhealaithe a chur chun cinn i gcomhréir leis [an tSraith Straitéisí um Príomhshruthú Inscne](#). Ba cheart go gcuideodh gníomhaíochtaí an tionscadail le cumhachtú comhionann na mban agus na bhfear ina n-éagsúlacht ar fad, lena n-áirítear go mbainfidh siad barr a gcumais amach agus go mbainfidh siad leas as na cearta céanna. Ba cheart go mbeadh iarracht á déanamh freisin na leibhéal idirdhealaithe a mbíonn ar ghrúpaí ar leith déileáil leo a laghdú (mar aon leo siúd atá i mbaol idirdhealú ar bhonn cúinsí éagsúla) agus torthaí comhionannais a fheabhsú do dhaoine aonair. Ba cheart breithnithe inscne agus neamh-idirdhealaithe a chomhtháthú sna tograí agus ba cheart díriú ar ionadaíocht atá cothrom ó thaobh inscne de i bhfoirne agus i ngníomhaíochtaí tionscadail. Tá sé tábhachtach freisin go ndéanfar sonraí aonair arna mbailiú ag na tairbhíthe a mhiondealú de réir inscne ([sonraí atá neamh-idirdhealaithe ó thaobh inscne de](#)), de réir míchumais nó de réir aoise nuair is féidir é.

Ní mór d'iarratasóirí a léiriú ina n-iarratas go bhfuil prionsabail eiticíúla agus luachanna an Aontais á n-urramú acu ar bhonn Airteagal 2 den Chonradh ar an Aontas Eorpach agus Airteagal 21 de Chairt um Chearta Bunúsacha an Aontais Eorpaigh.

Thairis sin, ní mór do rannpháirtithe neamhbhrabúis príobháideacha a chuireann gníomhaíochtaí i gcric ina bhfuil leanaí páirteach beartas um chosaint leanaí a bheith acu lena gcumhdaítear na ceithre réimse a ndéantar cur síos orthu sna [Caighdeáin um Chosaint Leanáí maidir le Leanáí a Choinneáil Sábháilte](#). Ní mór don bheartas sin a bheith ar fáil go follasach ar líne do gach duine a bhíonn i dteagmháil leis an eagraíocht. Ní mór faisnéis shoiléir a bheith ann faoi earcú comhaltaí foirne (lena n-áirítear oiliúnaithe agus oibríthe deonacha) agus ní mór seiceálacha cúlra (grinnfhiosrúchán) a áireamh ann freisin. Ní mór nósanna imeachta soiléire agus rialacha don fhoireann a áireamh ann, lena n-áirítear rialacha maidir le tuairisciú, agus oiliúint leanúnach. I gcás iarratasóirí ar eintitis phoiblí iad agus a chuireann gníomhaíochtaí i gcric ina bhfuil leanaí páirteach, ní mór dóibh dearbhú a sholáthar maidir le comhlíonadh na gceanglas um chosaint leanaí (féach cuid 5).

## **7. Acmhainn airgeadais agus oibríochtúil agus eisiamh**

### *Acmhainn airgeadais*

Ní mór d'iarratasóirí **acmhainní cobhsaí, leordhóthanacha** a bheith acu chun na tionscadail a chur chun feidhme go rathúil agus chun a gcion féin a dhéanamh. Ní mór acmhainn leordhóthanach a bheith ag eagraíochtaí atá rannpháirteach i roinnt tionscadal chun na tionscadail sin go léir a chur chun feidhme.

Déanfar an tseiceáil ar an acmhainn airgeadais ar bhonn na ndoiciméad a iarrfar ort a uaslódáil chuig an [gClár Rannpháirtithe](#) le linn ullmhú an deontais (*e.g. cuntas brabúis agus caillteanais agus clár comhardaithe, plean gnó, tuarascáil iniúchóireachta arna hullmhú ag iniúchóir seachtrach formheasta, ina ndeimhnítear na cuntais don bhliain airgeadais deiridh a dúnadh, etc.*). Beidh an anailís bunaithe ar tháscairí airgeadais neodracha, ach cuirfear gnéithe eile san áireamh freisin, amhail spleáchas ar mhaoiniú ón Aontas Eorpach agus easnamh agus ioncam i rith na mblianta roimhe sin.

Déanfar an tseiceáil de ghnáth i ndáil leis na comhordaitheoirí uile, ach amháin i gcás:

- comhlachtaí poiblí (eintitis a bunaíodh mar chomhlacht poiblí faoin dlí náisiúnta, lena n-áirítear údarais áitiúla, réigiúnacha nó náisiúnta) nó eagraíochtaí idirnáisiúnta.
- más rud é nach bhfuil méid an deontais arna iarraidh níos mó ná EUR 60 000.


Más gá, féadfar an tseiceáil a dhéanamh i ndáil le heintitis chleamhnaithe freisin.

Má shílimid nach bhfuil d'acmhainn airgeadais sásúil, is féidir linn an méid seo a leanas a iarraidh:

- tuilleadh faisnéise.
- córas feabhsaithe um fhreagracht airgeadais, i.e., freagracht chomhpháirteach agus leithleach do gach tairbhí nó dliteanas comhpháirteach agus leithleach eintiteas cleamhnaithe (*féach thíos, cuid 10*).
- réamh-mhaoiniú arna íoc ina thráthchodanna.
- ráthaíochtaí réamh-mhaoinithe (ceann amháin nó níos mó) (*féach thíos, cuid 10*).

nó

- gan réamh-mhaoiniú a mholadh.
- a iarraidh go gcuirfear duine éigin i d'áit nó, más gá, diúltú don togra ina iomláine.

 Má theastaíonn tuilleadh faisnéise uait, *féach na [Rialacha maidir le Bailíochtú Eintiteas Díltheanach, Ceapachán LEAR agus Measúnú ar Acmhainn Airgeadais](#)*.

### *Acmhainn oibríochtúil*

Ní mór d'iaratasóirí an **fios gnó, na cáilíochtaí** agus na **hacmhainní** a bheith acu chun na tionscadail a chur chun feidhme go rathúil agus chun a gcion féin a dhéanamh (lena n-áirítear taithí leordhóthanach ar thionscadail de mhéid agus de chineál inchomparáide).

Déanfar an acmhainn sin a mheasúnú in éineacht leis an gcritéar dámhachtana 'Cáilíochta', ar bhonn inniúlacht agus taithí na n-iaratasóirí agus a bhfoirne tionscadail, lena n-áirítear acmhainní oibríochtúla (acmhainní daonna, teicniúla agus eile) nó, go heisceachtúil, na bearta a mholtar chun an acmhainn sin a fháil faoin am a gcuirfear tús le cur chun feidhme an taisc.

Má dhéantar meastóireacht dhearfach ar an gcritéar dámhachtana, meastar go bhfuil acmhainn oibríochtúil leordhóthanach ag na hiarratasóirí.

Beidh ar iaratasóirí a n-acmhainn a léiriú tríd an bhfaisnéis seo a leanas a sholáthar:

- próifílí ginearálta (cáilíochtaí agus taithí) na gcomhaltaí foirne atá freagrach as an tionscadal a bhainistiú agus a chur chun feidhme.
- tuairisc ar rannpháirtithe an chuibhreannais.
- liosta na dtionscadal a bhí ann roimhe seo (príomhthionscadail le 4 bliana anuas; *tá teimpléad ar fáil i gCuid B*).

Féadfar doiciméid tacaíochta bhreise a iarraidh, más gá, chun acmhainn oibríochtúil aon iartrasóra a dheimhniú.

Tá comhlachtaí poiblí, eagraíochtaí de chuid na mBallstát agus eagraíochtaí idirnáisiúnta díolmhaithe ón tseiceáil ar acmhainn oibríochtúil.



### Eisiamh

I gcás iarratasóirí atá faoi réir **chinneadh AE maidir le heisiamh** nó i gceann de na **cásanna eisiamh** seo a leanas a chuireann bac orthu maoiniú a fháil ón Aontas Eorpach, NÍ féidir leo a bheith páirteach<sup>14</sup>:

- féimheacht, foirceannadh, gnóthaí arna riar ag na cúirteanna, comhshocrú le creidiúnaithe, gníomhaíochtaí gnó fionraithe nó nósanna imeachta eile dá samhail (lena n-áirítear nósanna imeachta do dhaoine a bhfuil dliteanas neamhtheoranta orthu i leith fhiacha an iarratasóra)
- sárú ar oibleagáidí slándála sóisialta nó oibleagáidí cánach (lena n-áirítear sárú arna dhéanamh ag daoine a bhfuil dliteanas neamhtheoranta orthu i leith fhiacha an iarratasóra)
- a bheith ciontach as mí-iompar gairmiúil tromchúiseach<sup>15</sup> (lena n-áirítear mí-iompar dá leithéid arna dhéanamh ag daoine a bhfuil cumhachtaí ionadaíochta, cinnteoireachta nó rialaithe acu, úinéirí tairbhiúla nó daoine atá bunriachtanach chun an deontas a dhámhachtain/a chur chun feidhme)
- calaois, éilliú, naisc le heagraíocht choiriúil, sciúradh airgid, coireanna a bhaineann leis an sceimhlitheoireacht (lena n-áirítear maoiniú sceimhlitheoireachta), saothar leanaí nó gáinneáil ar dhaoine (lena n-áirítear gníomh arna dhéanamh ag daoine a bhfuil cumhachtaí ionadaíochta, cinnteoireachta nó rialaithe acu, úinéirí tairbhiúla nó daoine atá bunriachtanach chun an deontas a dhámhachtain/a chur chun feidhme)
- easnamh mhóra maidir le príomhoibleagáidí a chomhlíonadh faoi chonradh soláthair, comhaontú deontais, duais, sainchonradh de chuid an Aontais, nó a leithéid (lena n-áirítear easnamh i gcás daoine a bhfuil cumhachtaí ionadaíochta, cinnteoireachta nó rialaithe acu, úinéirí tairbhiúla nó daoine atá bunriachtanach chun an deontas a dhámhachtain/a chur chun feidhme)
- a bheith ciontach as neamhrialtachtaí de réir bhrí Airteagal 1(2) de Rialachán Uimh. [2988/95](#) (lena n-áirítear beart neamhrialta arna dhéanamh ag daoine a bhfuil cumhachtaí ionadaíochta, cinnteoireachta nó rialaithe acu, úinéirí tairbhiúla nó daoine atá bunriachtanach chun an deontas a dhámhachtain/a chur chun feidhme)
- bunú faoi dhlínse dhifriúil agus é ina aidhm leis sin dul timpeall ar oibleagáidí fíoscacha, sóisialta nó dlíthiúla eile sa tír thionscnaimh nó eintiteas eile a bhunú chun na críche sin (lena n-áirítear bunú arna dhéanamh ag daoine a bhfuil cumhachtaí ionadaíochta, cinnteoireachta nó rialaithe acu, úinéirí tairbhiúla nó daoine atá bunriachtanach chun an deontas a dhámhachtain/a chur chun feidhme).

Diúltófar d'iarratasóirí freisin sna cásanna seo a leanas<sup>16</sup>:

- le linn an nós imeachta dámhachtana, thug siad bréagléiriú ar fhaisnéis a bhí ag teastáil mar choinníoll le páirt a ghlacadh nó mhainnigh siad an fhaisnéis sin a sholáthar
- bhí baint acu roimhe seo le hullmhú an ghlaó, rud a fhágann go bhfuil saobhadh iomaíochta i gceist nach féidir a leigheas ar shlí eile (coinbhleacht leasa).

<sup>14</sup> Féach Airteagail 136 agus 141 de Rialachán Airgeadais [2018/1046](#) an Aontais Eorpaigh.

<sup>15</sup> Áirítear an méid seo a leanas le mí-iompar gairmiúil: sárú ar chaighdeán eiteiciúla na gairme, iompar éagórach a bhfuil tionchar aige ar inchreidteacht ghairmiúil, dearbhuithe bréagacha/míléiriú bréagach faisnéise, rannpháirtíocht i gcairtéal nó i gcomhaontú eile lena saobhtar iomaíocht, sárú ar chearta maoinne intleachtúla, iarracht a dhéanamh tionchar a imirt ar phróisis chinnteoireachta nó faisnéis rúnda a fháil ó údaráis phoiblí chun buntáiste a fháil.

<sup>16</sup> Féach Airteagal 141 de Rialachán Airgeadais [2018/1046](#) an AE.

## 8. Nós imeachta meastóireachta agus dámhachtana

Beidh ar na tograí cloí leis an **nós imeachta caighdeánach maidir le cur isteach agus meastóireacht** (céim amháin a bhaineann le cur isteach + céim amháin a bhaineann le meastóireacht)

Déanfaidh **coiste meastóireachta** (le cúnaimh ó shaineolaithe seachtracha neamhspleácha) measúnú ar gach iarratas. Seiceálfar tograí ar dtús maidir le ceanglais fhoirmiúla (inghlacthacht agus incháilitheacht, *féach codanna 5 agus 6*). I gcás togaí a mheastar atá inghlactha agus incháilithe, déanfar iad a mheas i gcomparáid leis an acmhainn oibríochtúil agus leis na critéir dhámhachtana (*féach codanna 7 agus 9*) agus ansin rangófar iad de réir a scór.

I gcás tograí a bhfuil an scór céanna acu, cinnfear **ord tosaíochta** de réir an chur chuige seo a leanas:

I ndiaidh a chéile i gcás gach grúpa tograí *ex aequo*, ag tosú leis an ngrúpa ag a bhfuil an scór is airde, agus ag leanúint ar aghaidh in ord íslitheach:

- 1) Tabharfar tús áite do na tograí *ex aequo* laistigh den topaic chéanna de réir na scór a bronnadh orthu don chritéar dámhachtana 'Ábharthacht'. Nuair a bheidh na scóir sin comhionann, bunófar tosaíocht ar bhonn a scór ar an gcritéar 'Cáilíocht'. Nuair a bheidh na scóir sin comhionann, bunófar tosaíocht ar bhonn a scór ar an gcritéar 'Tionchar'.

Cuirfear gach togra ar an eolas faoi thoradh na meastóireachta (**litir thoradh na meastóireachta**). Iarrfar ar thograí rathúla a bheith páirteach san ullmhúchán i gcomhair deontais; áireofar na cinn eile ar an liosta ionadaithe nó diúltófar dóibh.

Ní thugtar aon ghealltanas maidir le maoiniú — NÍ hIONANN cuireadh chun deontas a ullmhú agus gealltanas foirmiúil maidir le maoiniú. Beidh orainn seiceálacha dlíthiúla éagsúla a dhéanamh fós roimh dhámhachtain an deontais: *bailíochtú eintitis dhlítheanaigh, acmhainn airgeadais, seiceáil ar eisiaimh, etc.*

Mar chuid den **ullmhúchán i gcomhair deontais**, beidh idirphlé ann chun mionchoigeartú a dhéanamh ar ghnéithe teicniúla nó airgeadais an tionscadail agus d'fhéadfadh sé nár mhór faisnéis bhreise a fháil uait. D'fhéadfadh sé go mbeadh coigeartuithe san áireamh freisin ar an togra chun aghaidh a thabhairt ar mholtaí ón gcoiste meastóireachta nó ar ábhair imní eile. Beidh comhlíonadh ina réamhchoinníoll chun an deontas a shíniú.

Má chreideann tú go raibh locht ar an nós imeachta meastóireachta, féadfaidh tú **gearán** a chur isteach (de réir na spriocdhátaí agus na nósanna imeachta arna sonrú i litir thoradh na meastóireachta). Tabhair do d'aire go meastar go bhfuarthas rochtain ar fhógraí nár osclaíodh laistigh de 10 lá tar éis iad a sheoladh agus go gcomhairfear spriocdhátaí ón uair oscailte/rochtana (*féach freisin [Tearmaí agus Coinníollacha na Tairsí Maoinithe & Tairiscintí](#)*). Tabhair do d'aire freisin, i gcás gearáin a chuirtear isteach go leictreonach, go bhféadfadh teorainneacha carachtair a bheith i gceist.

## 9. Critéir dhámhachtana

Is iad seo a leanas na **critéir dhámhachtana** don ghla seo:

1. **Ábharthacht:** a mhéid a mheaitseálann an togra tosaíochtaí agus cuspóirí an ghla; riachtanais atá sainithe go soiléir agus measúnú láidir ar riachtanais; spriocghrúpa atá sainithe go soiléir, agus gné na hinscne á cur san áireamh go cuí; rannchuidiú le comhthéacs straitéiseach agus reachtach an Aontais; gné Eorpach/thrasnáisiúnta; tionchar/leas do roinnt tíortha (tíortha de chuid an Aontais nó tíortha incháilithe nach bhfuil san Aontas); an fhéidearthacht na

torthaí a úsáid i dtíortha eile (deis chun dea-chleachtais a aistriú); deis comhiontaoibh/comhar trasteorann a fhorbairt; seachaint dúblála le tionscadail arna maoiniú faoi chlár eile de chuid an Aontais nó tionscadal nó tionscadail roimhe seo faoin sruth maoinithe céanna; sineirgí agus comhlántachtaí a chothú le gníomhartha eile (40 pointe)

- 2. Cáilíocht:** soiléireacht agus comhsheasmhacht an tionscadail; naisc loighciúla idir na fadhbanna arna n-aithint, na riachtanais agus na réitigh a mholtar (coincheap an chreata loighciúil); an mhodheolaíocht chun an tionscadal a chur chun feidhme agus gné na hinscne á cur san áireamh mar is iomchuí (eagrú na hoibre, tráthchlár, leithdháileadh acmhainní agus dáileadh cúraimí idir comhpháirtithe, rioscaí agus bainistíocht, faireachán agus meastóireacht orthu); déileáiltear le saincheisteanna eiticíúla agus le comhlíonadh luachanna an Aontais; indéantacht an tionscadail laistigh den achar ama a bheartaítear; (40 pointe)
- 3. Tionchar:** uaimhian na dtorthaí agus an tionchar fadtéarmach a mheastar a bheidh acu ar spriocghrúpaí/ar an bpobal i gcoitinne; straitéis iomchuí scaipthe chun inbhuanaitheacht agus tionchar fadtéarmach a áirithiú; an fhéidearthacht a bhaineann le héifeacht iolrach dhearfach; inbhuanaitheacht torthaí i ndiaidh deireadh a bheith tagtha le maoiniú ón Aontas (20 pointe)

Critéir dhámhachtana	Pas-scór íosta	Scór uasta
Relevance	25	40
Cáilíocht	neamhbhainteach	40
Tionchar	neamhbhainteach	20
<b>Scóir (pas) fhoriomlána</b>	<b>70</b>	<b>100</b>

Líon uasta na bpointí: 100 pointe.

Tairseach aonair don chritéar 'Ábharthacht': 25/40 pointe.

Tairseach fhoriomlán: 70 pointe.

Déanfar tograí a sháraíonn an tairseach aonair don chritéar 'Ábharthacht' AGUS an tairseach fhoriomlán a mheas le haghaidh maoinithe — laistigh de theorainneacha an bhuiséid atá ar fáil (i.e., suas go dtí an uasteorainn bhuiséid). Diúltófar do thograí eile.

## 10. Leagan amach dlíthiúil agus airgeadais na gComhaontuithe Deontais

Má éiríonn leat sa mheastóireacht, tabharfar cuireadh do do thionscadal chuig an ullmhúchán i gcomhair an deontais, agus iarrfar ort an Comhaontú Deontais a ullmhú in éineacht le hOifigeach Tionscadal an Aontais.

Is leis an gComhaontú Deontais sin a leagfar síos an creat le haghaidh do dheontais agus na téarmaí agus coinníollacha a ghabhann leis, go háirithe maidir le táirgí insólathartha, tuairisciú agus íocaíochtaí.

Is féidir teacht ar an tSamhail-Chomhaontú Deontais a úsáidfear (agus gach teimpléad agus doiciméad treorach ábhartha eile) ar [Thairseach na nDoiciméad Tagartha](#).

### *Dáta tosaigh agus fad an tionscadail*

Sonrófar dáta tosaigh agus fad an tionscadail sa Chomhaontú Deontais (*Bileog Sonraí, pointe 1*). De ghnáth, beidh an dáta tosaigh tar éis shíniú an deontais agus ar a dhéanaí laistigh de 6 mhí tar éis shíniú an deontais. Is féidir dáta tosaigh cúlghabhálach a dheonú go heisceachtúil más ann do chúiseanna a bhfuil údar cuí leo — ach ní cheadófar a leithéid riamh roimh an dáta a chuirtear an togra isteach.

Fad an tionscadail: féach cuid 6

### *Garspriocanna agus táirgí insoláthartha*

Déanfar garspriocanna (neamhbhainteach i gcás Nascadh Bailte) agus táirgí insoláthartha le haghaidh gach tionscadal a bhainistiú trí Chóras Bainistíochta Deontais na Tairsí agus beidh sonraí ina leith le fáil in Iarscríbhinn 1 den Chomhaontú Deontais.

Ní mór na gníomhaíochtaí tionscadail a eagrú mar aon phacáiste oibre amháin (PO).

Ba cheart go bhfreagródh pacáiste oibre amháin d'imeacht amháin nó roinnt imeachtaí san fhoirm iarratais. Bain leas as pacáiste oibre aonair ar feadh ré iomlán na gníomhaíochta agus aon táirge insoláthartha amháin in aghaidh an imeachta.

San iomlán beidh 1 phacáiste oibre amháin agat agus 2 tháirge insoláthartha nó níos mó de réir líon na n-imeachtaí. Ní mór na táirgí insoláthartha a chur isteach ag deireadh gach imeachta.

1 phacáiste oibre = 1 imeacht amháin nó níos mó = gníomhaíocht amháin nó roinnt gníomhaíochtaí

Ní mór an Bhileog um Chur Síos ar an Imeacht, ceann in aghaidh an imeachta (doiciméad éigeantach), a chur san áireamh i dtáirgí insoláthartha na bpacáistí oibre. Ní mór na Bileoga um Chur Síos ar an Imeacht a fhoilsiú ar leathanach gréasáin an bhardais/an chomhordaitheora maidir leis na tionscadail roghnaithe, agus d'fhéadfaí a áireamh leo freisin clár oibre nó miontuairiscí cruinnithe, tuarascálacha meastóireachta agus/nó tuarascálacha rialaithe cáilíochta, sraith táscairí chun measúnú a dhéanamh ar ghníomhaíochtaí agus ar a dtionchar, tuarascálacha coincheapa/pleanála, bróisiúir, moltaí, agus doiciméid straitéiseacha eile ina bhfuil conclúidí na ngníomhaíochtaí. I gcás gach imeachta, ba cheart liosta tinrimh a bheith ar fáil ar a bhfuil síniú agus dáta, chomh maith le cruthúnas ar thaisteal agus cothú na rannpháirtithe idirnáisiúnta go léir, agus ba cheart do chomhordaitheoir an tionscadail é a choinneáil le haghaidh aon seiceálacha agus iniúchtaí a dhéanfaidh seirbhísí an Aontais mar a shonraítear in airteagal 25 den chomhaontú deontais.

Is éard is imeacht ann gníomhaíocht amháin nó sraith gníomhaíochtaí, nach gá iad a dhéanamh ar an lá céanna, arb é is aidhm léi daoine a bhailiú a bhfuil rannpháirtíocht dhíreach, infhíoraithe acu sa spriocghrúpa nó sna spriocghrúpaí, chun téama réamhshainithe a phlé. Bíonn sé ina chuspóir le himeacht aschur cinnte a bhaint amach mar a shainmhínítear sa phacáiste oibre tagartha. Chun bheith incháilithe i gcomhair maoiniú, ní mór do líon iomlán na rannpháirtithe díreacha atá páirteach san imeacht cloí leis na ceanglais íosta ar rannpháirtithe/tíortha a leagtar síos sa chinneadh cnapsuime.

Ní cheadaítear maoiniú dúbailte. Dá bhrí sin, ní féidir rannpháirtithe díreacha a áireamh ach aon uair amháin don imeacht iomlán faoin bpacáiste oibre céanna, fiú má ghlacann siad páirt i roinnt gníomhaíochtaí/tionscadal.

### An cineál deontais, an ráta maoinithe agus méid uasta an deontais

Socrófar paraiméadair an deontais (*méid uasta an deontais, ráta maoinithe, costais incháilithe iomlána, etc.*) sa Chomhaontú Deontais (*Bileog Sonraí, pointe 3 agus airteagal 5*).

Buiséad an tionscadail (méid uasta an deontais): féach cuid 6 thuas.

Deontas cnapshuime a bheidh sa deontas. Ciallaíonn sé sin go n-aisíofar suim sheasta, bunaithe ar chnapshuim nó ar mhaoiniú nach bhfuil nasctha le costais. Socróidh an t-údarás dámhachtana an méid ar bhonn na méideanna athraitheacha atá réamhshocraithe agus ar bhonn na meastachán atá curtha in iúl ag na tairbhíthe ina mbuiséad tionscadail.

### Catagóirí buiséid agus rialacha maidir le hincháilitheacht costas

Tá na catagóirí buiséid agus na rialacha maidir le hincháilitheacht costas leagtha síos sa Chomhaontú Deontais (*Bileog Sonraí, pointe 3, airteagal 6 agus Iarscríbhinn 2*).

*Catagóirí buiséid don ghla seo:*


- Ranníocaíochtaí cnapshuime<sup>17</sup>

*Rialacha sonracha incháilitheachta costais don ghla seo:*

- ní mór méid na cnapshuime a ríomh i gcomhréir leis an modheolaíocht atá leagtha amach sa chinneadh cnapshuime agus úsáid á baint as an tábla buiséid mionsonraithe/áireamhán a sholáthraítear
- ba cheart do ríomh na cnapshuime cloí leis na coinníollacha seo a leanas: líon na rannpháirtithe idirnáisiúnta ar tugadh cuireadh dóibh (líon na rannpháirtithe ó chomhpháirtithe comhlachaithe atá ag taisteal ó thír chuig tír eile atá ag óstáil imeacht um Nascadh Bailte).

I ndiaidh an deontas a shíniú, ní bhfaighidh tú aon réamh-mhaoiniú. Íoc an iarmhéid: Ag deireadh an tionscadail, déanfaimid méid do dheontais deiridh a ríomh. Má tá iomlán aon íocaíochtaí a rinneadh roimhe sin níos airde ná méid an deontais deiridh, iarrfaimid ort (do chomhordaitheoir) an difríocht a aisíoc (aisghabháil).

Is leis an gcomhordaitheoir a dhéanfar gach íocaíocht.

 Tabhair do d'aire le do thoil go ndéanfar íocaíochtaí a ísliú go huathoibríoch má bhíonn fiacha gan íoc leis an Aontas Eorpach s (údarás deontais nó comhlachtaí eile de chuid an Aontais) ag duine de bhaill do chuibhreannais. Déanfaimid fiacha den sórt sin a chúiteamh — de réir na gcoinníollacha atá leagtha amach sa Chomhaontú Deontais (*féach airteagal 22*).

Tabhair faoi deara freisin go bhfuil tú freagrach as taifid a choinneáil maidir leis an obair ar fad a dhéantar.

### Ráthaíochtaí réamh-mhaoinithe

Má tá ráthaíocht réamh-mhaoinithe de dhíth, sonrófar an ráthaíocht sa Chomhaontú Deontais (*Bileog Sonraí, pointe 4*). Socrófar an méid le linn ullmhú an deontais agus de ghnáth beidh sé cothrom leis an réamh-mhaoiniú do do dheontas, nó níos ísle.

Ba cheart an ráthaíocht a bheith in euro agus ba cheart gur banc/institiúid airgeadais fhormheasta atá bunaithe i mBallstát de chuid an Aontais a eiseoidh í. Má tá tú bunaithe

<sup>17</sup> [Cinneadh](#) an 26 Márta 2021 lena n-údaraithear cnapshuimeanna a úsáid le haghaidh gníomhaíochtaí faoin gClár um Shaoránaigh, Comhionannas, Cearta agus Luachanna (2021-2027).

i dtír nach tír den Aontas Eorpach í agus más mian leat ráthaíocht a thabhairt ó bhanc/institiúid airgeadais i do thír féin, déan teagmháil linn (is féidir glacadh leis sin ar bhonn eisceachtúil, má sholáthraíonn sé slándáil choibhéiseach).

NÍ ghlacfar le suimeanna atá blocáilte i gcuntais bhainc mar ráthaíochtaí airgeadais.

Is gnách go n-iarrtar ráthaíochtaí réamh-mhaoinithe ar an gcomhordaitheoir, ar son an chuibhreannais. Ní mór iad a sholáthar le linn ullmhúchán an deontais, in am chun an réamh-mhaoiniú a dhéanamh (cóip scanta tríd an Tairseach AGUS an bhunchóip tríd an bpost).

Má chomhaontaítear sin linn, féadfar ráthaíocht ó thríú páirtí a chur in ionad na ráthaíochta bainc.

Scaoilfear an ráthaíocht ag deireadh an deontais, i gcomhréir leis na coinníollacha a shonraítear sa Chomhaontú Deontais (airteagal 23).

### Deimhnithe

Ag brath ar an gcineál gníomhaíochta, méid an deontais agus an cineál tairbhíthe, d'fhéadfadh sé go n-iarrfar ort deimhnithe difriúla a chur isteach. Socraítear cineálacha, sceidil agus tairseacha gach deimhnithe sa chomhaontú deontais (*Bileog Sonraí, pointe 4 agus airteagal 24*).

### Córas dliteanais i gcomhair aisghabhálacha

Socrófar an córas dliteanais le haghaidh aisghabhálacha sa Chomhaontú Deontais (*Bileog Sonraí, pointe 4.4 agus airteagal 22*).

I gcás tairbhíthe, beidh ceann amháin acu seo a leanas i gceist:

- dliteanas teoranta comhpháirteach agus leithleach le huasteorainneacha aonair – *gach tairbhí* suas go dtí méid uasta an deontais
- dliteanas comhpháirteach agus leithleach neamhchoinníollach – *gach tairbhí suas go dtí méid uasta an deontais le haghaidh na gníomhaíochta* nó
- freagracht airgeadais aonair – *gach tairbhí as a bhfiacha féin, agus as na fiacha sin amháin.*

Ina theannta sin, d'fhéadfadh sé go n-éileodh an t-údarás deonúcháin dliteanas comhpháirteach agus leithleach na n-eintiteas cleamhnaithe (lena dtairbhí).

### Forálacha maidir le cur chun feidhme an tionscadail

Rialacha CMI: *féach an tSamhail-Chomhaontú Deontais (airteagal 16 agus Iarscríbhinn 5)*:

- cearta úsáide maidir le torthaí: Tá

Cumarsáid, scaipeadh agus infheictheacht an mhaoinithe: *féach an tSamhail-Chomhaontú Deontais (airteagal 17 agus Iarscríbhinn 5)*:


- gníomhaíochtaí breise cumarsáide agus scaipthe: Tá

### Sainiúlachtaí eile

neamhbhainteach

### Neamhchomhlíonadh agus sárú conartha

Déantar foráil sa Chomhaontú Deontais (caibidil 5) maidir leis na bearta is féidir linn a dhéanamh i gcás sárú conartha (agus saincheistanna eile maidir le neamhchomhlíonadh).

 Má theastaíonn tuilleadh faisnéise uait, féach [AGA – Comhaontú Deontais Anótáilte](#).

## **11. Conas iarratas a chur isteach**

Ní mór gach togra a chur isteach go díreach ar líne trí Chóras Leictreonach um Chur Isteach na Tairisí Maoinithe & Tairiscintí. NÍ ghlactar le hiarratais pháipéir.

Is **próiseas 2 chéim** atá i gceist le hiarratas a chur isteach:

### **a) cruthaigh cuntas úsáideora agus cláraigh d’eagraíocht**

Chun an Córas um Chur Isteach a úsáid (an t-aon bhealach amháin le hiarratas a dhéanamh), ní mór do gach rannpháirtí [cuntas úsáideora EULogin a chruthú](#).

Nuair a bheidh cuntas EULogin agat, is féidir leat [d’eagraíocht a chlárú](#) sa Chlár Rannpháirtithe. Nuair a bheidh do chlárú curtha i gcrích agat, gheobhaidh tú cód aitheantais rannpháirtí ina mbeidh 9 ndigit.

### **b) an togra a chur isteach**

Téigh chuig an gCóras Leictreonach um Chur Isteach tríd an leathanach Topaice sa chuid [Cuardaigh Maoiniú & Tairiscintí](#) (nó, i gcás glaonna a sheoltar trí chuireadh chun togra a chur isteach, tríd an nasc a chuirtear ar fáil sa litir chuiridh).

Cuir isteach do thogra ina 4 chuid, mar seo a leanas:

- Áirítear i gCuid A faisnéis riaracháin faoi na heagraíochtaí is iarratasóir (an comhordaitheoir a bheidh ann, na tairbhíthe, na heintitis chleamhnaithe agus na comhpháirtithe comhlachaithe) agus an buiséad achoimrithe don togra. Líon isteach go díreach ar líne é
- I gCuid B (tuairisc ar an ngníomhaíocht), cumhdaítear ábhar teicniúil an togra. Íoslódáil an teimpléad éigeantach Word ón gCóras um Chur Isteach, líon isteach é agus uaslódáil mar chomhad PDF é
- Cuid C ina bhfuil sonraí breise faoin tionscadal. Le líonadh isteach go díreach ar líne.
- Iarscríbhinní (*féach cuid 5*). Uaslódáil iad mar chomhad PDF (comhad amháin nó roinnt comhad ag brath ar na slíotáin). Uaireanta is féidir comhad Excel a uaslódáil, ag brath ar an gcineál comhaid.

Ní mór don togra cloí le **líon uasta na leathanach** (*féach cuid 5*); ní thabharfar aird ar leathanaigh bhreise.

Ní mór doiciméid a uaslódáil chuig an **gcatagóir cheart** sa Chóras um Chur Isteach nó d’fhéadfaí a mheas go bhfuil an togra neamhiomlán agus, dá bhrí sin, go bhfuil sé neamh-inghlactha.

Ní mór an togra a chur isteach roimh **spriocdháta an ghlaó** (*féach cuid 4*). Tar éis an spriocdháta sin, tá an córas dúnta agus ní féidir tograí a chur isteach a thuilleadh.

A luaithe a bheidh an togra curtha isteach, gheobhaidh tú **ríomhphost deimhnithe** (ina mbeidh dáta agus am déanta d’iarratais). Mura bhfaigheann tú an ríomhphost

deimhnithe sin, ciallaíonn sé NACH bhfuil do thogra curtha isteach. Má chreideann tú gur locht sa Chóras um Chur Isteach is cúis leis sin, ba cheart duit gearán a dhéanamh láithreach trí [fhoirm ghréasáin na Deisce Cabhrach TF](#), ina mínítear na cúinsí agus ina gceanglaítear cóip den togra (agus, más féidir, gabhálacha scáileáin chun an méid a tharla a léiriú).

Tá cur síos ar shonraí maidir le próisis agus nósanna imeachta le fáil sa [Lámhleabhar ar Líne](#). Tá naisc le fáil freisin sa Lámhleabhar ar Líne chuig Ceisteanna Coitianta agus chuig treoracha mionsonraithe maidir le Córas Leictreonach Malartaithe na Tairsí.

## 12. Cabhair

A mhéid is féidir, **déan iarracht na freagraí a theastaíonn uait féin a aimsiú**, sna doiciméid seo agus sna doiciméid eile (tá acmhainní teoranta againn chun fiosrúcháin dhíreacha a láimhseáil):

- [Lámhleabhar Ar Líne](#)
- Ceisteanna Coitianta ar an leathanach Topaice (maidir le ceisteanna a bhaineann go sonrach le glaonna i nglaoanna oscailte; ní bhaineann siad le gníomhaíochtaí trí chuireadh)
- [Tairseach Ceisteanna Coitianta](#) (le haghaidh ceisteanna ginearálta).

Féach ar an leathanach Topaice go rialta freisin, ós rud é go n-úsáidfimid é chun nuashonruithe ar an nglao a fhoilsiú. (I gcás cuirí, déanfaimid teagmháil dhíreach leat i gcás nuashonrú ar an nglao).

### *Teagmháil*

Má tá ceisteanna aonair agat maidir leis an gCóras Tairsí um Chur Isteach, déan teagmháil leis an [Deasc Chabhrach TF](#).

Ba cheart ceisteanna nach mbaineann le TF a chur chuig an seoladh ríomhphoist seo a leanas: [FACEA-CERV@ec.europa.eu](mailto:FACEA-CERV@ec.europa.eu).

Luaigh go soiléir an tagairt don ghlaó agus don topaic lena mbaineann do cheist (*féach an leathanach clúdaigh*).



## 13. Tábhachtach



### TÁBHACHTACH

- **Ná fan go dtí an nóiméad deireanach** — Comhlánaigh d'iarratas roimh an spriocdháta chun **fadhbanna teicniúla** ag an nóiméad deireanach a sheachaint. Is ar do phriacal féin atá fadhbanna a bhaineann le hiarratais a chur isteach ag an nóiméad deireanach (*e.g. brú ar an suíomh, etc.*). NÍ féidir síneadh ama a chur le spriocdhátaí glaonna.
- **Féach** ar leathanach Topaice na Tairsí go rialta. Bainimid úsáid as chun nuashonruithe a fhoilsiú agus faisnéis bhreise faoin nglao (nuashonruithe faoin nglao agus faoi thopaicí) a fhoilsiú.
- **Córas Leictreonach Malartaithe na Tairsí um Maoiniú & Tairiscintí** — Trí iarratas a chur isteach **toilíonn** gach rannpháirtí an córas leictreonach malartaithe a úsáid i gcomhréir le [Tearmaí & Coinníollacha na Tairsí](#).
- **Clárú** — Roimh iarratas a chur isteach, ní mór go mbeadh gach tairbhí, gach eintiteas cleamhnaithe agus gach comhpháirtí comhlachaithe cláraithe sa [Chlár Rannpháirtithe](#). Tá an cód aitheantais rannpháirtí (cód amháin do gach rannpháirtí) éigeantach don Fhoirm Iarratais.
- **Róil chuibhreannais** — Nuair a bhíonn do chuibhreannas á bhunú agat, ba cheart duit smaoineamh ar eagraíochtaí a d'fhéadfadh cabhrú leat cuspóirí a chomhlíonadh agus fadhbanna a réiteach.

Ba cheart na ról a shannadh de réir an leibhéil rannpháirtíochta sa tionscadal. Ba cheart do na príomh-rannpháirtithe a bheith rannpháirteach mar **tairbhithe** nó mar **eintitis chleamhnaithe**; is féidir le heintitis eile a bheith rannpháirteach mar chomhpháirtithe comhlachaithe, fochonraitheoirí agus tríú páirtithe a thugann ranníocaíochtaí comhchineáil. Ba cheart do **chomhpháirtithe comhlachaithe** agus tríú páirtithe a thugann ranníocaíochtaí comhchineáil a gcostais féin a iompar (ní ghlacfar leo mar fhaighteoirí foirmiúla maoinithe ón Aontas). Ba cheart gur cuid theoranta de ghnáth **an fochonraitheoireacht** agus ní mór gurb iad tríú páirtithe (seachas ceann de na tairbhithe/eintitis chleamhnaithe) a bheadh ina bun. Maidir le fochonraitheoireacht a théann thar 30% de na costais incháilithe iomlána, ní mór údar cuí a bheith leis sin san iarratas.

**Comhordaitheoir** — I ndáil le deontais do roinnt tairbhithe, glacann na tairbhithe páirt mar chuibhreannas (grúpa tairbhithe). Beidh orthu comhordaitheoir a roghnú a bheidh i bhfeighil bhainistiú agus chomhordú an tionscadail agus a dhéanfaidh ionadaíocht thar ceann an chuibhreannais i leith an údarais deonúcháin. I gcás deontas a bhfuil aon tairbhí amháin i gceist leo, is é an tairbhí aonair a bheidh ina chomhordaitheoir go huathoibríoch.

- **Eintitis chleamhnaithe** — Féadfaidh iarratasóirí a bheith rannpháirteach le heintitis chleamhnaithe (i.e. eintitis atá nasctha le tairbhe atá rannpháirteach sa ghníomhaíocht agus a bhfuil cearta agus oibleagáidí acu atá cosúil leo siúd atá ag na tairbhithe, ach nach síníonn an deontas agus, dá bhrí sin, nach tairbhithe iad féin). Gheobhaidh siad cuid den airgead deontais agus, dá bhrí sin, ní mór dóibh cloí le coinníollacha uile an ghlaio agus ní mór iad a bhailíochtú (cosúil leis na tairbhithe); ach ní áirítear iad sna critéir íosta incháilitheachta a bhaineann le comhdhéanamh cuibhreannais (más ann dóibh).
- **Comhpháirtithe comhlachaithe** — Féadfaidh iarratasóirí páirt a ghlacadh i dteannta le comhpháirtithe comhlachaithe (i.e. eagraíochtaí comhpháirtíochta atá rannpháirteach sa ghníomhaíocht ach nach bhfuil an ceart acu airgead deontais a fháil). Glacann siad páirt ann gan mhaoiniú agus, dá bhrí sin, ní gá iad a bhailíochtú.

- **Comhaontú cuibhreannais** — Ar chúiseanna praiticiúla agus dlíthiúla, moltar socruithe inmheánacha a bhunú a chuirfidh ar do chumas déileáil le cúinsí eisceachtúla nó cúinsí nach raibh súil leo (i ngach cás, fiú mura bhfuil siad éigeantach faoin gComhaontú Deontais). Ina theannta sin, is deis é an comhaontú cuibhreannais chun an t-airgead deontais a athdháileadh de réir phrionsabail agus paraiméadair inmheánacha do chuibhreannais féin (is féidir le tairbhí amháin a airgead deontais a athshannadh do thairbhí eile, mar shampla). Dá réir sin, is féidir leat leas a bhaint as an gcomhaontú cuibhreannais chun an deontas ón Aontas Eorpach a chur in oiriúint do na riachtanais atá ag do chuibhreannais féin, agus is féidir leis tú a chosaint i gcás díospóidí freisin.
- **Buiséad comhardaithe tionscadail** — In iarratais ar dheontas, ní mór a áirithiú go mbeidh buiséad tionscadail comhardaithe agus dóthain acmhainní eile ann chun an tionscadal a chur chun feidhme go rathúil (e.g. *ranníocaíochtaí dílse, ioncam arna ghníúint ag an ngníomhaíocht, ranníocaíochtaí airgeadais ó thríú páirtithe, etc.*). D'fhéadfadh sé go n-iarrfaí ort do chostais mheasta a ísliú, má tá siad neamh-incháilithe (an iomarca san áireamh).
- **Tionscadail chríochnaithe/leanúnacha** — Diúltófar do thograí le haghaidh tionscadal atá curtha i gcrích cheana féin; déanfar measúnú ar thograí do thionscadail a bhfuil tús curtha leo cheana féin de réir an cháis (sa chás seo, ní féidir aon chostais a aisíoc le haghaidh gníomhaíochtaí a rinneadh roimh dháta tosaigh an tionscadail/cur isteach an togra).
- **Riail an neamhbhrabúis** — Ní fhéadfaidh deontais brabús a dhéanamh (i.e. barrachas ioncaim + deontas AE thar chostais). Seiceálfaimid é sin ag deireadh an tionscadail.
- **Ní cheadaítear maoiniú a chnardh/ní cheadaítear maoiniú dúbailte** — Tá dianchosc ar mhaoiniú a chnardh ó bhuiséad an Aontais (seachas faoi 'gníomhaíochtaí Sineirgí AE'). Seachas i gcás na ngníomhaíochtaí Sineirgí sin, ní fhéadfaidh aon ghníomhaíocht ar leith ach deontas AMHÁIN a fháil ó bhuiséad an Aontais agus Ní fhéadfar, in AON chúinsí, ítimí costais a áireamh faoi dhá dheontas ón Aontas. Más mian leat, mar sin féin, leas a bhaint as deiseanna maoinithe éagsúla ón Aontas, ní mór tionscadail a dhearadh mar ghníomhaíochtaí éagsúla, iad a bheith leagtha amach go soiléir agus deighilt a bheith eatarthu i leith gach deontais (gan forluí).
- **Comhcheangal le deontais oibriúcháin AE** — Cheadaítear comhcheangal le deontais oibriúcháin AE más féidir, má fhanann an tionscadal lasmuigh de chlár oibre an deontais oibriúcháin agus má áirithíonn tú go bhfuil ítimí costais deighilte go soiléir i do chuntasaíocht agus NACH bhfuil siad á ndearbhú faoi dhó (*féach [AGA – Samhail-Chomhaontú Deontais Anótáilte, airteagal 6.2.E](#)*).
- **Tograí iolracha** — Is féidir le hiarratasóirí níos mó ná togra amháin a chur isteach le haghaidh tionscadail dhifriúla faoin nglao céanna (agus féadfar maoiniú a dhámhachtain dóibh lena n-aghaidh).

Féadfaidh eagraíochtaí páirt a ghlacadh i roinnt tograí.

ACH: má tá roinnt tograí ann le haghaidh tionscadail *atá an-chosúil lena chéile*, ní ghlacfar ach le hiarratas amháin agus ní dhéanfar ach iarratas amháin a mheas; iarrfar ar na hiarratasóirí na cinn eile a tharraingt siar (nó diúltófar dóibh).
- **Cur isteach an athuair** — Féadfar tograí a athrú agus a chur isteach an athuair suas go dtí an spriocdháta lena gcur isteach.
- **Diúltú** — Trí iarratas a chur isteach, glacann gach iarratasóir le coinníollacha an ghlaio a leagtar amach sa Doiciméad Glaio seo (agus sna doiciméid dá dtagraíonn sé). **Diúltófar** do thograí nach gcomhlíonann coinníollacha uile an ghlaio. Baineann sé seo le hiarratasóirí freisin: Ní mór do gach iarratasóir na critéir a chomhlíonadh; mura gcomhlíonann iarratasóir amháin na critéir, ní mór iarratasóir eile a chur ina n-áit nó diúltófar don togra ina iomláine.

- **Cealú** — D'fhéadfadh sé go mbeadh imthosca ann ina mbeadh sé riachtanach an glao a chealú. Sa chás sin, cuirfear ar an eolas thú trí nuashonrú ar an nglao nó ar an topaic. Tabhair do d'aire nach bhfuil teidlíocht i gcomhair cúitimh i gceist i gcás cealú.
- **Teanga** — Is féidir leat do thogra a chur isteach in aon cheann de theangacha oifigiúla an Aontais (ba cheart an achoimre ar an tionscadal a bheith i mBéarla i gcónaí). Ar mhaithe le héifeachtúlacht, molaimid go láidir duit Béarla a úsáid san iarratas iomlán. Má theastaíonn doiciméid an ghlaio uait i dteanga oifigiúil eile de chuid an Aontais Eorpaigh, iarrtar ort iarratas a chur isteach laistigh de 10 lá tar éis fhoilsiú an ghlaio (tá na sonraí teagmhála le fáil i *gcuid 12*).
- **Trédhearcacht** — I gcomhréir le hAirteagal 38 de [Rialachán Airgeadais an Aontais Eorpaigh](#), foilsítear faisnéis gach bliain maidir le deontais ón Aontas arna ndámhachtain ar [shuíomh gréasáin Europa](#).

Áirítear leis sin:

- ainmneacha na dtairbhíthe
- seoltaí na dtairbhíthe
- an cuspóir a bhí leis an deontas a dhámhachtain
- an méid uasta a dámhadh.

Ar bhonn eisceachtúil, is féidir an foilseachán a tharscaoileadh (bunaithe ar iarraidh réasúnaithe a bhfuil údar cuí léi), má tá baol ann go gcuirfí do chearta agus do shaoirsí faoi Chairt um Chearta Bunúsacha an Aontais Eorpaigh i mbaol nó go bhféadfaí dochar a dhéanamh do do leasanna tráchtála dá nochtfaí é.

- **Cosaint sonraí** — Má chuirtear togra isteach faoin nglao seo, déantar sonraí pearsanta a bhailiú, a úsáid agus a phróiseáil. Próiseálfar na sonraí sin i gcomhréir leis an gcreat dlí is infheidhme. Ní phróiseálfar na sonraí ach chun críche do thogra a mheas, do dheontas a bhainistiú ina dhiaidh sin agus, más gá, chun faireachán, meastóireacht agus cumarsáid a bhaineann leis an gclár a dhéanamh. Mínítear na sonraí i [Ráiteas Príobháideachais na Tairisí Maoinithe & Tairiscintí](#).